

Datum: 22.11.2016.
Broj: 06-01/560

Svim medijima – dostavlja se

20 opština izradilo planove integriteta u saradnji sa TI BiH

Načelnici opština složni u mišljenju da će primjena planova integriteta i unapređenje transparentnosti opština biti važan faktor za razvoj opština i privlačenje investicija

Sarajevo, 22.11.2016. – Transparency International u Bosni i Hercegovini (TI BiH) je na konferenciji *Jačanje integriteta u jedinicama lokalne samouprave* predstavio rezultate saradnje sa 20 opština u BiH na kreiranju i usvajanju planova integriteta, tj. antikorupcionih dokumenata usmjerenih na otklanjanje mogućnosti za pojavu korupcije.

U 6 od 20 opština sa kojima je TI BiH intenzivno radio u protekle dvije godine, načelnici su već donijeli odluku o usvajanju planova integriteta, a do kraja godine se očekuje da planovi budu usvojeni i u preostalih 14 jedinica lokalne samouprave. TI BiH je opštinama pružao stručnu pomoć i obuke, te koordinisao proces sačinjavanja planova, dok su opštine same identifikovale ključne tačke djelovanja na sprečavanju korupcije.

„Pozitivna iskustva ovih 20 jedinica lokalne samouprave će, nadamo se, motivisati i ostale institucije, ne samo na lokalnom nivou, da započnu aktivnosti na unapređenju integriteta sa ciljem veće efikasnosti i kvaliteta rada, a TI BiH će nastaviti sa praćenjem provedbe planova integriteta i davati svoj doprinos u pogledu jačanja njihovih antikorupcijskih aktivnosti“, istakla je Lejla Ibranović, izvršna direktorica TI BiH.

Dragan Slipac, zamjenik direktora Agencije za prevenciju korupcije i koordinaciju borbe protiv korupcije (APIK) je naglasio da APIK nema dovoljno kapaciteta da prati rad svih nivoa vlasti u BiH, zbog čega ovakav angažman civilnog društva postaje još značajniji.

Svoja iskustva rada na projektu predstavili su Rado Savić, načelnik Opštine Lopare, Suad Huskić, načelnik Općine Tešanj i Nermin Ogršević, načelnik Općine Cazin. Načelnici ovih opština su složni u mišljenju da će unapređenje transparentnosti, kao i primjena planova integriteta, biti važni faktori za razvoj lokalnih zajednica i privlačenje investicija i ulaganja u ove opštine.

Na konferenciji je učešće uzelo oko stotinu predstavnika svih nivoa vlasti u BiH, načelnika opština i gradova, predstavnici ambasada, međunarodnih organizacija i organizacija civilnog društva.

Projekat je realizovan u saradnji sa Agencijom za prevenciju korupcije i koordinaciju borbe protiv korupcije BiH, Savezom općina i gradova Federacije BiH, Savezom opština i gradova Republike Srpske, a finansiran je od strane ambasade Kraljevine Holandije u BiH.

Loes Lammerts, zamjenica ambasadora Kraljevine Holandije je izrazila zadovoljstvo izrađenim planovima integriteta koji su ušli u proces usvajanja od strane načelnika opština, ali i podvukla da je ono najbitnije ispred lokalnih samouprava, a to je uspješna realizacija ciljeva postavljenih u planovima integriteta.